

Av salût propi tûc, cari siuri,
anche st'ani i sèi chî, tûc ansèma,
j'èi nènt pòura d'la tèra ch'la trèma
pr'el i asnàdi ch'j disu i pastûr.

Il sòn tûc che a truvè degli asnàdi,
culi là che 'd pi gròsi ùi n'è mèja,
l'è la roba pi fàcil ch'ùì sèja;
basta vighi 'l facèndi d'is mond.

J'avu toncia bei vial, chi an Italia,
tût cul verd l'era bel per la vista,
is fermàvu a uardèli i turista,...
tût pulid: j'è pasà l'ANANAS!

J'hòn bità tûc cui nûmer da scrivi
'nt j indirîs, j m'hon dic ch' l'è 'l progresso,
csè, spedènda magari 'n espresso,
stè tranquìl... ch'il ricèvu mai pû.

Ui va dòi o trèi mèis per 'na lêtra
e pû d'n ani per 'na cartulèn-na;
per la posta d'la nostra casen-na
meno male ch'a j'uma u tam-tam.

Ist'istà, quònd che i dî i sa slungàvu,
j m'hon dic che con l'ura legale
a j'avrèis risparmià, meno male,
'ns la bulêta d'la luce e del gas.

Quònd ch'a suma rivà (a) cula sira
che 'nt la noc j spustàvu tûc l'ura,
j'ho pensà che u dî dop, a bunûra,
um tucàva ben prèstu 'lvè sù.

Dop ch' j'hò snà, j'hò sarà tût el porti,
(per i piat ùi pensàva la siûra),
j'ho bità u svigiarèn nòn d'in ura
e pò 'm son anviarà 'ndè drumì.

Sûbit dop, mè mujè, nent savènda,
“l’ha bità u svigiaren nòn d’in ura”,
pò Mafè, e Medòr, Tirsi ancùra,
tûc cunvint ad rangè u svigiaren.

J’era pena rivà tacà u lec
e cmensàva ‘lvè ‘l scarpì dai pè
quònd ch’la sveglia la taca (a) sunè
ch’ l’era ura ormai d’alvè sù.

J’hò fàc prèstu a capì la facènda
ch’j’avu dic che con l’ura legale
a j’avrèis risparmià, meno male,
j m’hòn fàc risparmiè ‘nche ‘ns la sògn!

Vòj ciamèi a i esperti ‘d finònsa,
an pò prima ch’a vaga ‘n malùra,
cmèla mài che con la congiuntura
la munèida ‘s trovàva ‘nzèn post.

Cùì cmè me ch’j son drènta ‘l cumèrc,
j’hòn duvì per trop temp bati i cuèrc,
perchè j savu da bon pù cmè fè
quònd ch’u j’era di sold da scambiè.

Meno male ch’ l’è acqua pasàja
e che ‘ncò la finònsa la fila,
ma adès, coi nov bièt da sent-mila
cmè ch’a fàsa (a) dè u rèst di strachèn?

Figûrèv s’a j’hò sent-mila liri
da scambiè o da teni ‘nt la bursa:
u sarrèis pròpi ‘l càs d’andè ‘d cùrsa
csì ch’i ‘ntùr andè vendi j siràs!

Chi ‘n sità j’uma vist, an utùber,
tonc travài, tut pi bel, pulisèia,
j’eru nent travài masisèisa:
j spiciàvu Giusèp Saragàt.

Ma quònd ch’ l’è parti ‘l Presidente
la sità a l’è pù csì lisènta
e magàra j tròn fina l’armenta
‘ndò che prima j’hòn fac tût pulid.

A Lisòndria, parlònda 'd spetàcul,
un bsò nent jèsi menu da j ater:
j'hòn sà fac el pruget d'u teater
dop vent ani ch'j divu ch' l'è ûrgènt.

Se per fè 's gràm pruget (roba ûrgènta)
J'hòn spicià d'esi tûc veterani,
dès ch'ûi sèia pasà sinquont'ani
(j) cmensarròn a scavè i fundamènt.

I giornàl j son pen ad nutissij,
(e 'd luchèiri là 'n mèis ûi n'è tonti)
ma per lur j son tûti impurtonti,
e j ma spiègu anche i particulàr.

Ad Maurisio Arèna, a din jèn-na,
im na pàrlu ben ben tûc i di,
e j m'anfûrmu, parlònda 'd Titì,
fina l'ura ch' l'ha fac la...!

Tûc J parlu 'd cul libi 'd Svetlana
'ndò ch' la dis in gron ben ad sò pari:
s'ai credùma, um bsò piè 'l calendàri
e ch'ài giòntu 'nche "san barbisòn".

E parlònda d'la moda anche st'ani,
pensè 'n pò: con la moda spasiàl,
i vistì, dès ij fon ad metàl:
s'j sa s-ciòncu, pò j von da u tulè.

Quònd ch'j parlu d'Euròpa ûnija
(j) disu semp ch' l'è 'na roba ch' la sòpa:
cmè ch'us fa 'ndè d'acòrdi 'n Euròpa
fin ch'u j'è cul sicòn ad De Gaulle?!

L'è difìcil bitès tûc d'acordi
e 'd facèndi ùj n'è tonti sbagliàj;
quònd che 'l robi j son quasi rangiàj,
patatràc: ùi dà for cul nasòn!

J'ùma tònica pastis ans la tèra,
u duvrèis jèsi tût 'na famija,
ma 'nt el mond u j'è 'nmà d' l'anarchia,
e pò j voru sbarchè 'nt j àter mònd!

U j'è trop testi mati ch'j cmòndu
e j aurìjsu 'nfanghè 'l robì bon-ni;
dìs ch'us pò cambiè 'l cor al persòn-ni:
l'è la testa ch'u bsògna cambiè!

Fin 'sta nostra Divota Cumèdia
cuc mèis fa a mumènt la cambiàvu,
sàvu nenta cmè fè e stùdiavu
gli intensiòn ad j Ebrè e 'd l'Egìt.

Perchè il sèj che (a) la fen el Mesìa
um bsò ch'u scapa con tût la famìja,
ch'i l'aurìjsu masèl, lû csi cìt,
e us na va piòn pianèn an Egìt.

Ma Nassèr, pròpi 'n cùla stagiòn,
l'era bon ad spicièl coi canòn;
e 'l Bambèn, ch'u scapàva da chì,
al mandàvu 'n Egìt a murì.

Meno male che dèss el facèndi
smèja quasi ch'is sèju rangiài
e Nassèr dop ch' l'ha pers fina 'l bràij
a l'ha pû tonta vòja 'd sparè.

Ant el mond um bsurrèis che 'l person-ni
per 'na vota j serchèisu 'd sfursèsi
e uardè tûc ansèma 'd parlèsi
con amùr, da fradè, da cristiòn.

E pregùma che st'ani 'l Mesìa,
prèstu 'l faga finì ogni guèra
e che 'l mònda, anveci, 'ns la tera
per tûc j'omi, da bon, tonta pas.